



Broj predmeta: UP-I-KSI-09-11/25
Datum: 31.12.2025. godine

Na osnovu člana 25. i člana 33. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po anonimnoj prijavi u predmetu utvrđivanja povrede odredaba Zakona o sprečavanju sukoba interesa u institucijama Brčko distrikta Bosne i Hercegovine od strane B.M. iz Brčkog [REDACTED], Brčko, zastupnika u Skupštini Brčko distrikta BiH, nosioca javne funkcije, na 141. sjednici, održanoj dana 31.12.2025. godine, donosi

ZAKLJUČAK

Obustavlja se postupak protiv B.M. iz Brčkog, [REDACTED], Brčko, zastupnika u Skupštini Brčko distrikt BiH, nosioca javne funkcije, pokrenut Zaključkom, broj: UP-I-KSI-09-11/25 od 29.10.2025. godine, radi osnovane sumnje na povredu člana 11. stav (1), (2) i (3) a u vezi sa članom 2. tačka a), b), c), e), f), g) i h) Zakona o sprečavanju sukoba interesa u institucijama Brčko distrikta BiH.

Образложење

Dana 29.09.2025. godine Komisija za odlučivanje o sukobu interesa zaprimila je od strane anonimnog podnosioca prijavu protiv B.M. iz Brčkog, [REDACTED], poslanika u Skupštini Brčko distrikta BiH, kao nosioca javne funkcije, u predmetu broj: KSI-09-200/25, na postupanje i pokretanje postupka, radi sumnje na postojanje povrede odredaba Zakona o sprečavanju sukoba interesa u institucijama Brčko distrikta Bosne i Hercegovine.

U prijavi je navedeno da je B.M. član Komisije za rad, zdravlje i socijalnu zaštitu Skupštine Brčko distrikta BiH i da postoji sumnja da se nije izuzimao pri radu ove Komisije kao i pri glasanju na Skupštini kada su razmatrani i usvajani izvještaji, prijedlozi i drugi akti Fonda zdravstvenog osiguranja Brčko distrikta BiH i JZU „Zdravstveni centar Brčko“ Brčko distrikt BiH, a da u ovim pravnim licima / preduzećima koje je osnovao Distrikt rade sestra i supruga navedenog kao i on sam, te se smatra da postoji potencijalni ili stvarni sukob interesa zbog postojanja očigledne porodične veze sa osobama koje zavise od odluka i preporuka koje donosi navedena Komisija i Skupština Brčko distrikta BiH.

Obzirom da je uvjerenjem Centralne izborne komisije o dodjeli mandata, broj: 06-1-07-1-3513-13076/24 od 05.11.2024. godine kao i dostavljenim Aneksom I – Obrazac o javnoj funkciji i nosiocu javne funkcije u Skupštini Brčko distrikta Bosne i Hercegovine utvrđeno da je B.M. poslanik u Skupštini Brčko distrikta Bosne i Hercegovine i samim time nosilac javne funkcije obavezan pridržavati se odredaba Zakona o sprečavanju sukoba interesa u

institucijama Brčko distrikta Bosne i Hercegovine. Uvidom u registre Komisije i Izvještaj o imovinskom stanju nosioca javne funkcije takođe je vidljivo da je B.M. zaposlen kao doktor medicine u JZU „Zdravstveni centar Brčko“ Brčko distrikt BiH.

Članom 22. Poslovnika o radu Komisije za odlučivanje o sukobu interesa propisano je da je nosilac javne funkcije stranka u postupku.

U cilju provjere navoda iz prijave Komisija za odlučivanje o sukobu interesa se dopisom broj: KSI-09-200/25 od 30.09.2025. godine obratila zahtjevom za dostavu podataka Fondu zdravstvenog osiguranja Brčko distrikta BiH zahtijevajući opis poslova i radnih zadataka Stručnog saradnika za zdravstvenu zaštitu (sestra nosioca javne funkcije), odgovor da li zaposlena učestvuje u radu Komisija u okviru Fonda zdravstvenog osiguranja Brčko distrikta BiH, nazive pozicija u prethodnom periodu i visinu bruto plate ostvarene na tim pozicijama. Takođe Komisija se zahtjevom obratila i JZU „Zdravstveni centar Brčko“ Brčko distrikt BiH zahtijevajući podatke i opis poslova doktora stomatologije (supruga nosioca javne funkcije), kao i odgovor da li zaposlena učestvuje u radu Komisija u okviru JZU „Zdravstveni centar Brčko“ Brčko distrikt BiH, te nazive pozicija u prethodnom periodu i visinu bruto plate ostvarene na tim pozicijama.

JZU „Zdravstveni centar Brčko“ Brčko distrikt BiH je dopisom broj: 1165/25 od 06.10.2025. godine dostavila podatke o tome da je [REDACTED] zaposlena na poziciji doktora stomatologije u okviru Službe za stomatologiju Doma zdravlja u Brčkom, kao i opis poslova doktora stomatologije, navodeći da visina bruto plate doktora stomatologije iznosi 4.029,52 KM, te da osim linearnog, nije bilo drugih povećanja.

Nosilac javne funkcije je istim Zaključkom pozvan da Komisiji za odlučivanje o sukobu interesa dostavi Izjašnjenje u roku od 15 dana od dana dostavljanja Zaključka.

Komisija za odlučivanje o sukobu interesa je dana 05.11.2025. godine, a shodno odredbama člana 32. stav (4) poslala Skupštini Brčko distrikta BiH obavještenje da zbog pokretanja postupka za utvrđivanja postojanja povreda odredaba Zakona odnosno sukoba interesa od strane nosioca javne funkcije, B.M., isti prekine sve aktivnosti koje su direktno ili indirektno vezane za sukob interesa ili povredu Zakona do okončanja postupka, a koje se odnose na raspravljanje, glasanje i odlučivanje o aktima, izvještajima o radu i slično Fonda zdravstvenog osiguranja i JZU „Zdravstveni centar Brčko“ Brčko distrikt BiH, zbog rada povezanih lica i samog nosioca javne funkcije u navedenim preduzećima/pravnim licima.

Dana 11.11.2025. godine, u zakonskom roku, Komisiji je dostavljeno pisano Izjašnjenje na Zaključak Komisije o pokretanju postupka, broj: UP-I-KSI-09-11/25 od 29.10.2025. godine, u kojem nosilac javne funkcije navodi da smatra da nije poduzeo niti jednu radnju koja bi ga dovela u sukob interesa, odnosno kojom bi ostvario lični interes za sebe ili sa njim povezana lica, nadalje navodi da ukoliko postoji sumnja na potencijalni sukob interesa da mu se na to ukaže, kako ubuduće takve radnje ne bi ponavljao.

Komisija se obratila i Stručnoj službi Skupštine Brčko distrikta BiH zahtijevajući dostavu podataka o opisu poslova Komisije za rad, zdravstvo i socijalnu zaštitu, odgovor da li je poslanik B.M. član ili predsjednik Komisije, da li se izuzimao iz rada odnosno sjednica Komisije za rad, zdravstvo i socijalnu zaštitu kao i sa sjednica Skupštine Brčko distrikta BiH kada je razmatran odnosno usvajanje Izvještaj o radu kako Fonda zdravstvenog osiguranja Brčko distrikt BiH tako i JZU „Zdravstveni centar Brčko“ Brčko distrikt BiH. Iz dostavljenih nepotpunih odgovora tokom oktobra 2025. godine od strane navedenih pravnih lica / preduzeća i Skupštine Brčko distrikta BiH, bilo je vidljivo iz opisa poslova da su povezana lica nosioca javne funkcije najvjerovatnije učestvovala u izradi Izvještaja, Odluka (direktno ili indirektno)

u pravnim licima odnosno preduzećima u kojima nosilac javne funkcije i s njim povezana lica imaju finansijski interes (platu), a da se B.M. nije izuzimao iz raspravljanja i odlučivanja kako propisuje član 11. stav (3) Zakona o sprečavanju sukoba interesa u institucijama Brčko distrikta Bosne i Hercegovine.

U skladu sa navedenim, obzirom na nadležnosti i aktivnosti nosioca javne funkcije, te prikupljene podatke od Skupštine Brčko distrikta Bosne i Hercegovine, Fonda zdravstvenog osiguranja Brčko distrikt BiH i JZU „Zdravstveni centar Brčko“ Brčko distrikt BiH, postojala je osnovana sumnja da je imenovani B.M. iz Brčkog, poslanik u Skupštini Brčko distrikta Bosne i Hercegovine, kao nosilac javne funkcije, prekršio odredbe člana 11. Zakona o sprečavanju sukoba interesa u institucijama Brčko distrikta Bosne i Hercegovine, na način da je učestvovao u procesu raspravljanja, odlučivanja i glasanja vezano za rasprave i učestvovanje u glasanju kako na sjednicama Skupštine Brčko distrikta Bosne i Hercegovine tako i pri radu Komisije za rad, zdravstvo i socijalnu zaštitu iako je njegov bliski srodnik odnosno povezano lice ostvarivalo finansijski interes u preduzeću / pravnom licu, te učestvovalo u izradi opštih akata i izvještaja koji su predmet rasprave na sjednicama Komisije za rad, zdravstvo i socijalnu zaštitu i Skupštine Brčko distrikta Bosne i Hercegovine.

Na osnovu navedene prijave i prikupljenih podataka, Zaključkom broj: UP-I-KSI-09-11/25 od 29.10.2025. godine, Komisija je pokrenula postupak protiv B.M., poslanika u Skupštini Brčko distrikta BiH, kao nosioca javne funkcije, radi osnovane sumnje na povredu člana 11. stav (1), (2) i (3) a u vezi sa članom 2. tačka a), b), c), e), f), g) i h) Zakona o sprečavanju sukoba interesa u institucijama Brčko distrikta BiH, koja proizlazi iz okolnosti da je učestvovao u procesu glasanja i odlučivanja, a bio je dužan izuzeti se.

Naime, član 11. stav (1), (2) i (3) Zakona o sprečavanju sukoba interesa u institucijama Brčko distrikta Bosne i Hercegovine, u dijelu zabrane djelovanja u slučaju sukoba interesa propisuje da nosilac javne funkcije ne može učestvovati u procesu odlučivanja niti glasati po bilo kojem pitanju koje nosioca javne funkcije stavlja u sukob interesa što uključuje pitanja koja se direktno i indirektno tiču preduzeća u kojem taj nosilac javne funkcije ili s njim povezano lice ima finansijski i drugi interes, te bilo kojem drugom pitanju koje se direktno ili indirektno tiče povezanog lica, te takođe nosilac javne funkcije je dužan prijaviti finansijski i drugi interes te ne preduzimati nikakve službene radnje koje su od uticaja na poslovanje preduzeća u kojem nosilac javne funkcije ili s njim povezano lice ima finansijski interes, kao ni radnje kojima nosilac funkcije ili s njim povezano lice ostvaruje finansijski interes, te da je s tim u vezi nosilac javne funkcije dužan izuzeti se od svih službenih radnji, učešća u raspravi, glasanja i odlučivanja i obrazložiti razloge izuzeća.

Članom 2. tačka a), b), c), e), f) g) i h) Zakona o sprečavanju sukoba interesa u institucijama Brčko distrikta Bosne i Hercegovine, data je definicija da je:

- a. „sukob interesa“ situacija kada nosilac javne funkcije ima privatni interes koji utiče, može uticati ili se stvara utisak da utiče na obavljanje javne funkcije;
- b. „javna funkcija“ funkcija izabranog ili imenovanog lica u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnog ovlaštenja i lica koje je imenovano, odnosno na čiji izbor ili imenovanje saglasnost daje Skupština Brčko distrikta Bosne i Hercegovine odnosno Vlada Brčko distrikta Bosne i Hercegovine ukoliko drugim zakonom nije drugačije propisano;
- c. „nosilac javne funkcije“ izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lica koje je imenovano, odnosno na čiji izbor i

imenovanje saglasnost daje Skupština, odnosno Vlada, ukoliko drugim zakonom nije drugačije propisano;

- e. „povezano lice“ je član uže porodice, srodnik u pravoj liniji, srodnik u pobočnoj liniji do trećeg stepena, srodnik po tazbini do drugog stepena, dijete bračnog druga ili bilo koje pravno ili fizičko lice koje je s nosiocem javne funkcije u ličnoj, političkoj, ekonomskoj ili drugoj vezi koja utiče ili bi mogla uticati na objektivnost i nepristrasnost u radu nosioca javne funkcije;
- f. „član uže porodice“ je bračni i vanbračni drug, usvojitelj, usvojenik, dijete, majka i otac nosioca javne funkcije, odnosno lice prema kome nosilac javne funkcije ima zakonsku obavezu izdržavanja;
- g. „finansijski interes“ je interes kojim se nosiocu javne funkcije omogućava da primi novac u vrijednosti većoj od 1.000 KM godišnje;
- h. „privatni interes“ je bilo kakva ostvarena ili moguća korist ili pogodnost za nosioca javne funkcije ili s njim povezanog lica.

Komisija je u cilju daljeg prikupljanja dokaza i utvrđivanja činjeničnog stanja dana 24.11.2025. godine, uputila Zahtjev za dostavu dodatnih podataka Stručnoj službi Skupštine Brčko distrikta BiH kojim je tražena dostava podataka o tome da li je i kada B.M., nosilac javne funkcije, poslanik u Skupštini Brčko distrikta BiH kao član Komisije za rad, zdravstvo i socijalnu zaštitu raspravljao, glasao i odlučivao o bilo kojoj vrsti akata Fonda zdravstvenog osiguranja Brčko distrikta BiH, koji su bili na sjednicama ove Komisije u period od kada je B.M. član iste, te da li je kao poslanik u Skupštini Brčko distrikta BiH raspravljao, glasao i odlučivao o bilo kojoj vrsti akata Fonda zdravstvenog osiguranja Brčko distrikta BiH, a koji su prethodno raspravljani na skupštinskoj Komisiji za rad, zdravstvo i socijalnu zaštitu. Istim dopisom je traženo da ukoliko postoje pravni akti Fonda zdravstvenog osiguranja Brčko distrikta BiH o kojima se raspravljalo, odlučivalo i glasalo od strane Komisije za rad, zdravstvo i socijalnu zaštitu navedu koji su to konkretno akti, njihov tačan naziv kao i vrijeme kad su bili predmet raspravljanja pred Komisijom za rad, zdravstvo i socijalnu zaštitu, te da li je bilo slučajeva da je ta Komisija takve akte vratila Fondu zdravstvenog osiguranja Brčko distrikta BiH bez da ih je uputila u daljnu skupštinsku proceduru kao i podatak da li se B.M. izuzimao od raspravljanja, glasanja i odlučivanja kao član navedene Komisije, ali i kao poslanik u Skupštini Brčko distrikta BiH.

Zahtjev za dostavu dodatnih podataka je dana 24.11.2025. godine, upućen i Fondu zdravstvenog osiguranja Brčko distrikta BiH u kojem su traženi podaci o tome koji su to konkretno akti Fonda zdravstvenog osiguranja Brčko distrikta BiH dostavljani Skupštini Brčko distrikta BiH u periodu obavljanja pozicije poslanika a koji su prošli skupštinsku proceduru, eventualno vraćeni na doradu s razlogom za vraćanje, kao i podatke o tome da li je [REDACTED] Stručni saradnik za zdravstvenu zaštitu mijenjala Šefa službe za zdravstvenu zaštitu tokom 2024. i 2025. godine, te da li je ista kao zamjenik predsjednika Komisije za kontrolu izvršenja ugovora o pružanju usluga zdravstvene zaštite učestvovala u radu ove Komisije, a ukoliko jeste kad i šta je konkretno u tim slučajevima bilo predmet raspravljanja shodno zadacima same komisije.

Odjeljenje za javni registar Vlade Brčko distrikta BiH je dopisom broj: 12-00000-471/25 od 02.12.2025. godine, a na zahtjev Komisije za odlučivanje o sukobi interesa od 28.11.2025. godine, dostavilo izvod iz Matične knjige rođenih za [REDACTED] na osnovu kojeg je utvrđeno da je [REDACTED] sestra B.M.

Skupština Brčko distrikta BiH je u aktu broj: 01.02-48-2238/25 od 03.12.2025. godine dostavila podatke da je na osnovu uvida u zapisnike skupštinske Komisije za rad, zdravstvo i socijalnu zaštitu utvrđeno da je B.M. učestvovao u raspravi i glasanju na pet sjednica, gdje su

razmatrani: Izvještaji o radu i finansijskom poslovanju Fonda zdravstvenog osiguranja Brčko distrikta BiH sa izvještajem o radu Upravnog odbora za 2023. i 2024. godinu, Odluka o rebalansu Finansijskog plana Fonda zdravstvenog osiguranja Brčko distrikta BiH za 2024. godinu, Finansijski plan Fonda zdravstvenog osiguranja Brčko distrikta BiH za 2025. godinu, Pravilnik o nagrađivanju radnika za uspješnost u radu Fonda zdravstvenog osiguranja Brčko distrikta BiH, Odluka o usklađivanju plata sa minimalnom platom u Fondu zdravstvenog osiguranja Brčko distrikta BiH, Pravilnik o platama i naknadama zaposlenih u Fondu zdravstvenog osiguranja Brčko distrikta BiH i Odluka o platama i kategorizaciji radnih mjesta u Fondu zdravstvenog osiguranja Brčko distrikta BiH. Nadalje je navedeno da je u svim navedenim slučajevima, Komisija za rad, zdravstvo i socijalnu zaštitu materijale prosljeđivala u dalju skupštinsku proceduru i da nijedan akt nije vraćen Fondu zdravstvenog osiguranja Brčko distrikta BiH bez razmatranja na sjednicama Skupštine Brčko distrikta BiH, kao i to da se B.M. nije izuzimao sa sjednica navedene Komisije, dok je na sjednicama Skupštine Brčko distrikta BiH glasao “ZA” i “SUZDRŽAN” pri glasanju o dvije tačke dnevnog reda i to: davanje saglasnosti na Odluku o usklađivanju plata s minimalnom platom u Fondu zdravstvenog osiguranja Brčko distrikta BiH i davanje saglasnosti na Pravilnik o izmjenama Pravilnika o platama i naknadama zaposlenika Fonda zdravstvenog osiguranja Brčko distrikta BiH.

Fond zdravstvenog osiguranja Brčko distrikta dopisom broj: 015-180/1-6045/25 od 08.12.2025. godine dostavio je podatke o tome koji akti Fonda zdravstvenog osiguranja Brčko distrikta BiH su dostavljeni Skupštini Brčko distrikta BiH za vrijeme rada poslanika i koji su prošli skupštinsku procedure a to su: Odluka o usklađivanju plata radnika sa minimalnom platom, Pravilnik o kriterijumima, visini i načinu obračuna naknade troškova prevoza na posao i prevoza s posla u Fondu zdravstvenog osiguranja Brčko distrikta BiH, Odluka o izmjenama Odluke o platama i kategorizaciji radnih mjesta u Fondu zdravstvenog osiguranja Brčko distrikta BiH, Pravilnik o izmjenama i dopunama Pravilnika o platama zaposlenih u Fondu zdravstvenog osiguranja Brčko distrikta BiH, Odluka o izmjenama Odluke o platama i kategorizaciji radnih mjesta u Fondu zdravstvenog osiguranja Brčko distrikta BiH, Pravilnik o dopuni Pravilnika o unutrašnjoj organizaciji i sistematizaciji radnih mjesta u Fondu zdravstvenog osiguranja Brčko distrikta BiH, Odluka o donošenju Finansijskog plana Fonda zdravstvenog osiguranja Brčko distrikta BiH za 2025. godinu, Odluka o rebalansu Finansijskog plana Fonda zdravstvenog osiguranja Brčko distrikta BiH za 2024. godinu, Izvještaj o radu i finansijskom poslovanju sa Izvještajem o radu Upravnog odbora Fonda zdravstvenog osiguranja Brčko distrikta BiH za period od 01.01.2023. godine do 31.12.2023. godine, Odluka o usklađivanju plata sa minimalnom platom, Izvještaj o radu i finansijskom poslovanju Fonda zdravstvenog osiguranja Brčko distrikta BiH sa izvještajem o radu Upravnog odbora Fonda zdravstvenog osiguranja Brčko distrikta BiH za period od 01.01.2024. do 31.12.2024. godine, Izvještaj o radu i finansijskom poslovanju Fonda zdravstvenog osiguranja Brčko distrikta BiH od 01.01.2024. do 31.12.2024. godine, Izvještaj o radu Upravnog odbora Fonda zdravstvenog osiguranja Brčko distrikta BiH za period od 01.01.2024. godine do 31.12.2024. godine, Pravilnik o izmjenama Pravilnika o platama zaposlenika Fonda zdravstvenog osiguranja Brčko distrikta BiH, Odluka o izmjenama Odluke o platama i kategorizaciji radnih mjesta u Fondu zdravstvenog osiguranja Brčko distrikta BiH, Odluka o izmjenama finansijskog plana Fonda zdravstvenog osiguranja Brčko distrikta BiH za 2025. godinu i Izvještaj o radu Upravnog odbora Fonda zdravstvenog osiguranja Brčko distrikta BiH za period od 01.01.2025. godine do 30.06.2025. godine.

U istom dopisu su navedeni i akti koji su vraćeni Fondu zdravstvenog osiguranja Brčko distrikta BiH na doradu kao i razlog njihovog vraćanja, a to su: Odluka o rebalansu finansijskog plana Fonda zdravstvenog osiguranja Brčko distrikta BiH za 2024. godinu (iz razloga što je jedan od poslanika tražio na sjednici Skupštine Brčko distrikta BiH da se navedeni dokument dostavi na drugom jeziku), Izvještaj o radu i finansijskom poslovanju Fonda zdravstvenog osiguranja Brčko distrikta BiH za period od 01.01.2024. godine do 31.12.2024. godine (iz razloga što je iz Stručne službe Skupštine Brčko distrikta BiH traženo da se dostave odvojeno Izvještaj o radu i

finansijskom poslovanju Fonda zdravstvenog osiguranja Brčko distrikta BiH i Izvještaj o radu Upravnog odbora Fonda zdravstvenog osiguranja BiH, što je naknadno i učinjeno, iako su ranije izvještaji dostavljani objedinjeni i kao takvi usvajani) i Pravilnik o izmjenama pravilnika o platama zaposlenika Fonda zdravstvenog osiguranja Brčko distrikta BiH i Odluka o izmjenama Odluke o platama i kategorizaciji radnih mjesta u Fondu zdravstvenog osiguranja Brčko distrikta BiH (iz razloga što uz navedene dokumente nisu bili dostavljeni osnovni tekstovi sa svim izmjenama i dopunama).

U istom dopisu se navodi da je [REDAKTIRANO], Stručni saradnik za zdravstvenu zaštitu u periodu od 20.03.2024. godine do 30.06.2024. godine imala bruto platu u iznosu od 3.312,63 KM, a od 01.07.2024. godine, bruto platu u iznosu od 3.615,81 KM, te se ista povećala isključivo zbog linearnog povećanja plata svim zaposlenicima. Nadalje se navodi da je [REDAKTIRANO] mijenjala Šefa Službe za zdravstvenu zaštitu tokom 2024. i 2025. godine, i to u periodima od 09.10.2024. godine do 25.10.2024. godine, 08.01.2025. godine do 10.01.2025. godine, 03.02.2025. godine do 07.02.2025. godine, od 10.03.2025. godine do 14.03.2025. godine, dana 25.04.2025. godine, dana 30.05.2025. godine, od 20.06.2025. godine do 04.07.2025. godine, potom dana 07.11.2025. godine i dana 27.11.2025. godine.

Nadalje, navodi se da [REDAKTIRANO] kao zamjenik predsjednika Komisije za kontrolu izvršenja ugovora o pružanju usluga zdravstvene zaštite nije vršila kontrolu u tom svojstvu. U prilogu su dostavljeni Zapisnici iz Službe za zdravstvenu zaštitu, iz kojih je vidljivo da je imenovana učestvovala u kontrolama izvršenja ugovornih obaveza, i to: Zapisnik broj: 015-180/1-3000/25 od 17.06.2025. godine, Zapisnik broj: 015-180/1-3556/25 od 17.07.2025. godine, ali da se ne radi o kontroli izvršenja ugovornih obaveza niti Službe za stomatologiju Doma zdravlja u kojoj je zaposlena [REDAKTIRANO], srodnik po tazbini, niti Odjeljenja za ginekologiju i akušerstvo u kojem je zaposlen B.M., krvi srodnik odnosno brat navedene.

Obzirom na saznanja o kršenju Zakona o sprečavanju sukoba interesa u institucijama Brčko distrikta Bosne i Hercegovine od strane B.M., nosioca javne funkcije, poslanika u Skupštini Brčko distrikta BiH iz razloga raspravljanja i glasanja na sjednicama Komisije za rad, zdravstvo i socijalnu zaštitu Skupštine Brčko distrikta BiH te navoda da je njegova sestra [REDAKTIRANO], zaposlena u Fondu zdravstvenog osiguranja na radnom mjestu Stručni saradnik za zdravstvenu zaštitu između ostalog vršila poslove kontrole sprovođenja zdravstvene zaštite po nivoima djelatnosti, praćenja i analiziranja potrošnje finansijskih sredstava po svim nivoima zdravstvene zaštite kao i poslove izrade odluka, uputstava i drugih akata iz djelokruga Fonda zdravstvenog osiguranja Brčko distrikta BiH, a o kojima je raspravljao i glasao poslanik B.M., Komisija za odlučivanje o sukobu interesa je na osnovu prikupljene dokumentacije koju je dobila od strane Fonda zdravstvenog osiguranja Brčko distrikta BiH, JZU „Zdravstveni centar Brčko“ Brčko distrikt BiH i Stručne službe Skupštine Brčko distrikta BiH utvrdila da se B.M. nije izuzimao prilikom raspravljanja, odlučivanja i glasanja kako na sjednicama Skupštine Brčko distrikta BiH tako i pri radu Komisije za rad, zdravstvo i socijalnu zaštitu ali je takođe utvrdila da nije bilo ostvarenja koristi ili pogodnosti niti za nosioca javne funkcije tako ni sa njim povezanog lica, tj. njegove sestre [REDAKTIRANO] i supruge [REDAKTIRANO], niti je ista shodno svojim zadacima vršila kontrolu izvršenja ugovornih obaveza niti u Službi za stomatologiju u kojoj je zaposlena [REDAKTIRANO], srodnik po tazbini, niti Odjeljenja za ginekologiju i akušerstvo u kojem je zaposlen B.M., krvi srodnik odnosno brat navedene, a nije vršila ni izradu akata koji su se nalazile na dnevnom redu sjednica Komisije za rad, zdravstvo i socijalnu zaštitu i Skupštine Brčko distrikta BiH, te ni s te strane Komisija nije mogla utvrditi bilo kakve finansijske ili druge pogodnosti na strani nosioca javne funkcije i s njim povezanih lica, kao ni sukob interesa.

Komisija ističe da nosilac javne funkcije ubuduće treba izbjegavati sve situacije sukoba interesa u cilju savjesnog i odgovornog postupanja i primjene Zakona o sprečavanju sukoba interesa u institucijama Brčko distrikta BiH čiji cilj je da spriječi sukob interesa u obavljanju javne funkcije, posebno ističući načela odgovornosti, poštenja, savjesnosti i otvorenosti, ne

ugrožavajući povjerenje i pouzdanje građana. Stoga nosilac javne funkcije pri svakoj pojedinačnoj situaciji treba postupati na način da ukoliko utvrdi postojanje bilo kojeg interesa koji utiče, može uticati ili se stvara utisak da utiče na obavljanje javne funkcije, a pri tome učestvuje u diskusijama, razmatranju i donošenju odluka o pitanjima vezanim za pravno lice u kojem je zaposlen on ili povezano lice posebno ako se radi o nekom finansijskom interesu ili pogodnosti za nosioca javne funkcije ili povezano lice, treba to prijaviti i izuzimati se shodno članu 11. Zakona o sprečavanju sukoba interesa u institucijama Brčko distrikta BiH, članu 17. Poslovnika o radu Skupštine Brčko distrikta BiH i članu 15. Kodeksa ponašanja poslanika Skupštine Brčko distrikta BiH.

Finansijski interes je ovdje jasan, a ogleda se u novčanoj naknadi koju uposlenik prima kod poslodavca. Takođe, ukoliko je nosilac javne funkcije učestvovao u izradi dokumenta o kojem se odlučuje, ili se radi o nekom pitanju koji uključuje njega ili povezano lice, odnosno interesu koji utiče, može uticati ili se stvara utisak da utiče na obavljanje javne funkcije u takvim okolnostima nasilac javne funkcije nalazi se u situaciji da odlučuje o pitanju od značajnog interesa za njega ili povezano lice, te postupa suprotno predmetu, cilju i duhu Zakona o sprečavanju sukoba interesa u institucijama Brčko distrikta BiH. Prema tome, zastupnik dolazi u situaciju da kroz zakonodavno tijelo i njegove nadležnosti odlučuje o nekom pitanju vezanom za pravno lice u kojem ima interes on ili povezano lice. S tim u vezi, svjesno i odgovorno postupanje koje ne ugrožava povjerenje i pouzdanje građana, te koje ne stavlja svoj privatni interes i interes povezanih lica ili ličnu korist iznad javnog interesa, jeste ne učestvovanje u diskusijama, razmatranjima ili donošenju odluka o takvim pitanjima.

Kako u provedenom postupku nisu utvrđeni elementi kršenja zakonskih odredbi, Komisija cijeni da ne postoje zakonski osnovi za dalje vođenje postupka, te je odlučeno kao u dispozitivu ovog Zaključka.

POUKA O PRAVNOM LIJEKU

Saglasno odredbama člana 37. stav (1) Zakona, ova odluka je konačna u upravnom postupku i protiv iste nije dopuštena žalba, ali se može pokrenuti upravni spor u roku od 30 dana od dana dostavljanja odluke tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl. pravnik